



La giuria al Premi Term Bel 2022 (da san.): Giuanna Caviezel, Rico Valär, Fabiola Carigiet e Maria Victoria Haas (moderaziun).

FOTOS DAVID TRUTTMANN

## «In'experientscha unica ed extrema»

In punct culminant dals Dis da litteratura a Domat è per regla la concorrenza litterara Premi Term Bel. En il final era quest onn ina squadra giuvna da quatter auturas ed in autur. Ma pertge insumma inoltrar in text ed al suttammer al parairi d'ina giuria publica, in parairi che pudess tut tenor era esser «dir»? – Il Premi Term Bel 2022 da sonda passada ha dà intginas respostas.

DAVID TRUTTMANN/FMR

Igl è sonda suentermezdi, paucas minutas avant las 14.00. Tranter tut la glieud en il foyer da la Sala Tirral a Domat sa chattan era las quatter protagonistas ed il protagonist che vegnan a star en il center tar il proxim punct da program als 31avel Dis da litteratura – il Premi Term Bel. Els vegnan numnadain a preleger en pauc mument lur texts en sala – ed els vegnan a pudair (u stuair!) udir la valitaziun dad ina giuria litterara. Da gudagnar datti il premi principal ed in premi dal public. Las personas che prelegian quest onn èn *Flurina Badel* da Guarda, *Janic Maskos* da Scuol, *Natalia Salzgeber* da Gondiswil (BE), *Sidonia Pazeller* da Tarasp e *Viola Cadruvi* da Turigt.

### Il «place to be»

L'autura Viola Cadruvi è vegnida nominada quest onn gia per la terza giada per il final, ed ella ha era gia gudagnà il Premi Term Bel. «Mintga quatter onns inoltesch jau in text – ma quai è spira casualitad», di ella riend. L'onn 2014 aveva ella gudagnà il premi da la giuria, il 2018 il premi dal public. Ed ella sa regorda: «Per mai sco autura giuvna era il Premi Term Bel la gronda chaussa, per uschedir il «place to be». Gist per personas ch'entschavian da scriver èsi ina enorm bun'ocasiun per pudair insumma preleger ina giada publicamain in agen text e da survegnir in resun direct.» Ed ella sa regorda era dad in onn, ch'ils texts eran vegnids prelegids en moda anonima: «Jau seseva lura en sala e nagin na saveva da tgi che quel text era. Da pudair udir ina giada fitg direct las reacziuns amez il public, quai m'è restà ferm en memoria, forsia perfin dapli che la valitaziun da la giuria.»

Da la partida per la segunda giada al Premi Term Bel è Sidonia Pazeller, ella era vegnida nominada gia avant dus onns per il final. Quest onn prelegia l'Engiadinaisa in text en rumantsch grischun e di perquai sinceramain: «Mes text è atgnamain mo stà in exercizi en connex cun in curs da rg a l'universitad. Jau l'hai lura inoltrà pli per meraviglias, ed ussa sun jau qua!» – Cun tge finamira? – Sidonia Pazeller: «Tut simpel, per survegnir in resun che po sustegnair mes scriver.»

### Scriver «for fun»

Las ulteriuras duas auturas e l'autur prelegian per l'emprima giada en il final a Domat. Ma propi ferm gnervus/as na paran ellas/els betg dad esser perquai en il foyer. Il pli giuven

finalist, Janic Maskos che ha gist fatg matura, di: «Na, jau na sun betg gnervus ed jau n'hai er nagnas aspectativas spezialas. Jau vulesch simplamain avair blier plaschair durant questa concorrenza.» Unicamain Flurina Badel, in'autura rumantscha ch'ha gia gudagnà in Premi svizzer da litteratura, conceda: «Cler ch'jau sun gnervusa, ma quai è gea era in bel sentiment.» Ed ella agiunta cun in surrir: «Però jau avess schon plaschair da gudagnar il premi. A la fin èsi in giuè – ed ils gieus vulesch jau atgnamain adina gudagnar.»

Tenor in sumegliant princip sportiv para er Natalia Salzgeber da participar l'emprima giada al Premi Term Bel: «Jau scriv per uschedir «for fun». I fa simplamain plaschair da lavurar e glimar vi dad in text enfin ch'ins ha il sentiment ch'i saja bun. Ed ussa vala per mai il principi «chi non risica, non rosica», sco ch'ina amia m'ha encuraschà ina giada.» Janic Maskos furnescha, dasper il «fun», anc in'autra motivaziun pertge ch'el scriva insumma gugent e savens: «Scriver è per mai sco ina pausa durant il mintgadi. Igl è ina metoda per ordinar in pau il dischurden.»

### Il Premi Term Bel è in term fix

Gia bliers texts èn vegnids «ordinads» en il decurs dals davos trais decennis per ils Dis da litteratura. La concorrenza dal Premi Term Bel datti en ina u l'autra furma gia dapi l'entschatta dal happening litterar rumantsch, dapi il principi dals onns '90. Il modus da la concorrenza litterara è restà quasi il medem: tschintg texts inoltrads vegnan nominads per Domat,

là vegnan els discutads e valitads publicamain dad ina giuria, la quala va silsunter en clausura per dar enconuscent a la fin dals Dis da litteratura ils texts victurs (guarda boxa). Onn per onn datti atgnamain adina avunda (buns) texts rumantschs che pon lura vegnir prelegids, valitads e premiads a Domat.

### Ina nova experientscha

Entant èsi vegni las 14.00 a Domat. Igl è ruasavel en la Sala Tirral, schegea che la sala è plaina. Var 150 personas han meraviglias, legian ils texts, taidlan las prelecziuns e scutinan cun ils vischins. Ina finalista suenter l'auter sto ir sin il palc vi da la maisetta a preleger. Silsunter discutescha la giuria mintga text. Quest onn fan quai *Giuanna Caviezel*, *Rico Valär*, *Fabiola Carigiet* e la moderatura *Maria Victoria Haas*. La giuria descriva, declera, dumonda, dat tips, picla ora ivettas e valitescha. Entant sesan las auturas e l'autur sco sin spinas en sala e na pon betg pli intervegnir – igl è memia tard, lur text è ussa partì per dal bun.

Suenter duas uras è la «tortura» finida per ils finalists. La giuria va en clausura per decider. Uschia ch'igl è da spetgar. Ed igl è il mument per trair bilantscha. Co èsi stà per finalist e finalistas? – Natalia Salzgeber: «Igl è enorm interessant d'udir ina giada direct co che autras personas legian mes texts. Quai è propi stà ina nova experientscha.» – Sidonia Pazeller: «Da pudair udir ils differents resuns sin mes text, ma er sin ils auters, è stà fitg prezios. Forsa che la proxima giada èsi pli prudent d'inoltrar in text scrit aposta per la concorrenza e betg in exercizi dad in curs da lingua a l'universitad!» – Viola Cadruvi: «La giuria ha propi tutgà bain ils puncts centrals da mes texts. Forsa che jau sun en quatter onns puspè da la partida, tgi sa?» – Janic Maskos: «Quest è ussa stà in'experientscha unica ed extrema! Ma igl ha fatg plaschair. Il resun motivescha, cun quel poss jau lavurar.» – E Flurina Badel? Quella ha gudagnà il giuè ch'ella vuleva gudagnar, malgrà la gnervusadad: «Jau sun uschè engraziavla che mes text ha funcziunà, tar la giuria e tar il public. I vala la paina da scriver – igl è uschè impurtant ch'i vegnia scrit, gist per rumantsch.»

### Premi Term Bel: duas giadas Flurina Badel

L'autura ed artista engiadinaisa *Flurina Badel* gudogna quest onn tant il premi da la giuria (3000 frs.) sco era il premi dal public (1500 frs.) da la concorrenza litterara Premi Term Bel. Tenor il comité d'organaziun ha il text «BE CALM» da Flurina Badel pudì persvader «cun sia lingua poetica e sias associaziuns expressivas». Il text da l'autura ladina è in monolog intern che la giuria ha era descrit en la discussiun sco «cascada associativa lung il fil cotschen da l'aua».

La donatura dal Premi Term Bel è dapi divers onns la vischnanca burgaisa da Domat. (cdm/fmr)

RTR ha registrà las prelecziuns e las discussiuns da tut ils tschintg texts finalists dal Premi Term Bel.



## BRANSCHA DA TGIRA

### Nov sistem da scolaziun per cuntanscher dapli persunal


En il chantun mancan spezialists e spezialistas en diversas branschas. Ina branscha fitg pertugada è la branscha da tgira. Per promover dapli personas che lavuran en ina chassa da tgira, en l'ospital u tar la SpiteX ha il chantun midà cumpletamain il sistem da scolaziun.

RTR/FMR

Actualmain vegnan las studentas ed ils students da la scola spezialisada superiura da tgira engaschads dal Center da furmaziun per la sanadad ed ils fatgs socials a Cuir. A partir da l'atun 2023 sa mida quai dentant. Davent da lura accumpognan las interpresas da tgira sezzas il persunal dal fatg. Ils motivs sajan per l'ina che las studentas ed ils students emprendian in mastergn e ch'il cor da quella professiun sa chatta en las interpresas sezzas. En scola emprendian els simplamain l'expertisa, declera la mainaproject *Sandra Bosch*.

### Midada entras regenza grischuna

Inizià l'idea da restructuraziun ha il Cussegl grond avant trais onns. El ha dà l'incumbensa a la regenza grischuna da procurar per avunda plazzas d'empredissadi e da praticum per las studentas ed ils students da tgira. La regenza è perquai sa decida da far quella midada d'engaschament. Quai or da dus motivs, di il cusseglier guvernativ e minister da sanadad *Peter Peyer*: «Nus avain discurre cun las instituziuns da la branscha e laschà far in studi che demussa che quai è la megla soluziun per il chantun Grischun.»



A partir dal 2023 datti sis cuminzanzas da scolaziun regionalas (Partenz, Tavau, Grischun dal Sid, Grischun Central, Surselva e Val dal Rain da Cuir). Mintgina offera ina vasta purschida da plazzas d'empredissadi sco spezialista e spezialist da tgira SSS. FOTOS MAD



Spezialistas da tgira diplomadas futuras vegnan engaschadas da nov dals manaschis d'empredissadi grischuns.

### Sis cuminzanzas regionalas

Per pudair porscher bunas premissas da scolaziun e d'engaschament per tuttas studentas e students èn las differentas instituziuns da tgira s'alliadadas en sis cuminzanzas regionalas. Quai era per garantir ch'ins haja avunda persunal qualifitgà per scolar sin tut ils champs da tgira necessaris: l'ospital acut, la psichiatria, la tgira a lunga durada e la SpiteX. Cun la midada dal sistem è era il process d'annunzia sa midà. Dapi in mais datti ina plattafurma online che duai simplifitgar a personas interessadas ed a las fatschentas il process d'annunzia.

### Interpresas han reagì positiv

Sch'ina persona ha il giavisch da lavurar en il Grischun Central pudess ella per exempel far quai en il Center da sanadad Savognin u era tar la SpiteX Viamala a Tusaun. Sch'insatgi vulesch pli gugent lavurar en ina psichiatria po ella far quai tar ils Servetschs psichiatics dal Grischun a Cuir. E suenter quai process d'annunzia online pon ils giavischs d'engaschament lura el meglier cas gist vegnir ademplids. Tut quai munta dentant era dapli lavur per las singulas instituziuns da tgira. La mainaproject *Sandra Bosch* di dentant ch'ellas hajan reagì positiv sin la midada e ch'ellas sajan era pertschertas ch'ellas sajan responsablas ch'i dettia avunda persunal qualifitgà en la tgira.



Sidonia Pazeller.



Natalia Salzgeber.



Janic Maskos.



Viola Cadruvi.



Flurina Badel.